

Shamila Loefstok:

Mas All-inclusive ta pone nos trabou den peliger mas di loke e ta caba

ORANJESTAD – Dialuna mainta un grupo chikito di taxi a presenta cerca Minister di Turismo, Otmar Oduber, pa papia riba e situacion di hotelnan All-inclusive, ya cu pa nan esaki ta un situacion fastioso pasobra e cantidad di trabou lo bira menos pa nan, mirando cu esey ta sosodiendo na e momentonan aki.

Shamila Loefstok, kende ta un taxista y ta representa e compania di taxi Diamond pero tambe ta representa e otro 450 taxista, tabata sumamente contento con e reunion cu minister a bay. E situacion di All-inclusive no ta e unico preocupacion cu e taxistanan tin, pero nan ta preocupa cu nan no ta haya suficiente trabou, ya cu operadornan di bus di tour tambe ta kitando trabou for di nan.

Sra. Loefstok a indica despues cu nan a mira cu hotelnan All-inclusive tin pensa di crece, e taxistanan a bin cu e iniciativa di traha un carta, firma esaki y entrega e carta na minister. E taxista ta haya cu e firmamento di carta pa

minister a bay fructifero. “Mi ta hopi contento, mi ta gradici tur esunnan cu a firma pa entrega e manifiesto,” el a indica. Tin 450 taxi, di cual normalmente mester yega na un total di 225 mas 1 di firma pero nan a logra reuni 255 firma. Esaki a pone cu e taxistanan ta feliz di por a yega e cantidad aki.

No mas taxi

“Mas contento mi ta, cu mi a haya contestanan cu mi tabata kier for di minister Oduber,” sra. Loefstok a indica. Pa tur e taxistanan ta mas trankil, no lo bay tin mas taxista aki na Aruba, e taxista a sigura. Pa cu esaki tambe e ta contento.

Hopi cos pa drecha

Durante e reunion nan a papia riba hopi cos cu ainda tin pendiente. El a indica cu el a bisa minister cu e lo mira su persona un biaha mas, pasobra tin hopi cos mas cu mester wordo drecha. No solamente e situacion di All-inclusive cu ta perhudicando pais Aruba en general, pero tin mas cos cu mester wordo drecha na caminda.

Trabou lo bira menos

A puntra sra. Loefstok con nan a yega na e conclusion aki, si nan por a scucha mas partido den e desaroyo aki. “No solamente nos so a sinti esey. E trabou ta bay bira hopi mas menos di loke nos tabata haya en principio,” el a bisa. Pero tur restaurant cu a duna nan aportacion riba dje, All-inclusive no lo contribui na nan tampoco. Pasobra e restaurantnan no lo haya bishita di e turistanan cu lo bay keda den hotelnan All-inclusive. Si nan ta haya tur cos paga den hotel, no tin atraccion pa nan pafo di e hotel. E experiencia como taxista, segun sra. Loefstok, e poco di turista cu nan haya sea pa hiba aeropuerto of restaurant, ta reacciona sorprendi y ta puntra si esaki ta e caya principal di Aruba. “Kiermen nan no conoce Aruba mes. E no ta fructifero pa nos pais cu ta un perla den Caribe, anto nos ta haya bishitantenan cu no ta conoce Aruba,” el a sigura. “Nan ta keda cera den un hotel.”

Taxistanan no ta miyonario. Hopi ta mira cu tin taxistanan ta core auto nobo y grandi, pero segun sra. Loefstok, nan



ta biba normal. “Nos no por bisa cu nos ta bibando bon,” el a sigura. Como taxista, nan tambe tin hopi cos di paga pero tambe tin hopi cos cu nan no ta beneficia di dje. “Nos no ta biba miyonario. Si hopi hende ta kere cu taxista ta biba miyonario, no ta berdad. Nos tin hopi cos cu nos ta paga personal y nos no ta haya beneficio bek di dje.”

Turismo aki na Aruba ta basta bon, segun sra. Loefstok. “Ora nos ta papia di bon, ora nos temporada halto di 365 dia y no di un par di dia.” Na e momentonan aki e situacion di turismo ta hopi slow. Nan no ta haya e cantidad di turista manera nan tabata haya antes, el a indica. Sra. Loefstok tin dos aña como taxista y e ta indica cu ora el a cuminsa traha e comienso tabata fantastico. Aworaki nan ta considera cu aki na Aruba

ta den un temporada abou. Pa nan un miho mercado ta haya turistanan cu ta subi den nan auto, hiba nan riba un tour, hiba nan pa haci compras, kiermen unda cu taxistanan ta constantemente riba caya. “No cu bo tin cu sinta mei ora na un hotel pa bo haya un trip pa sea bo ta hib’e aeropuerto of restaurant anochi,” segun e taxista. Den waf tin hopi TO (Operador di Tour) cu ta kita trabou for di e taxistanan. Ora cu nan yega waf, nan mester warda e tour operadornan piki tur hende y bay cu nan. Esey ta pone cu e taxistanan mes no ta haya trabou, segun e taxista. Tin hopi cos cu mester drecha, pero nan no por wordo haci di dialuna pa diabierna. Pa por regla e asunto aki, tur cos mester bay poco, poco pa asina tur hende por haya un tiki di e bolo y no cu un hende so ta haya e bolo henter. □